



**Republika e Kosovës**  
Republika Kosova – Republic of Kosovo



**Komuna e Mitrovicës së Jugut**  
Opština Juzna Mitrovica – Municipality of Mitrovica South

**KUVENDI I KOMUNËS SË MITROVICËS SË JUGUT**

**Komiteti për Politikë dhe Financa**

**Nr. 02-060/01-0044310-1/24 dt. 11.07.2024**

**Mitrovicë**

**PROCESVERBAL**

**Nga mbledhja e rregullt e Komitetit për Politikë dhe Financa**

**Mbledhja e 31**

**Koha:** 11.07.2024 ora 10:00

**Vendi:** Salla e Mediave

**Të pranishëm:** Kryesuesja e Kuvendit znj. Vesa Broja

Anëtarët e Komitetit për Politikë dhe Financa: Fadil Veseli, Nazmije Sejdiu, Vesel Neziri, Shkurta Shosholli Musa, Hysen Muzliukaj, Erseka Barani, Muhamed Hoti dhe Xhyljeta Imeri

Drejtorët e Drejtorive

**Mungoi:**

Mbledhjen e hapi dhe kryesoi Kryesuesja e Kuvendit znj. Vesa Broja e cila theksoi se në zbatim të nenit 52, paragrafi 1, të Ligjit Nr. 03/L-040 Për vetëqeverisjen lokale; nenit 11 paragrafët: 1, 2 edhe 5 të Udhëzimit Administrativ (MPL) Nr. 05/2020 Për procedurën e themelimit, përbërjen dhe kompetencat e Komiteteve të përhershme dhe komiteteve tjera në komunë; nenit 62, të Statutit të Komunës së Mitrovicës; nenit 15, pika 2, të Rregullores Komonale për punën e komiteteve të Kuvendit të Komunës, për sot ka thirrur mbledhjen e 31-të të Komitetit për Politikë dhe Financa, rendin e ditës të paraparë me thirrje. Po ashtu me email e keni marrë edhe Draft-Planin lokal të veprimit për barazi gjinore 2024-2026, i cili do të propozohet të hyjë në rend dite. Sa i përket pikës 2, Propozim-vendim për këmbim të pronës së paluajtshme të Komunës me pronën e paluajtshme në pronësi private të personit fizik Blerim Emini, të njëjtën ekzekutivi nuk ka arritur ta kompletojë prandaj e tërheqim nga rendi i ditës, kjo pikë e kompletuar do të shqyrtohet në një prej mbledhjeve të radhës së KPF-së.

Në vazhdim Kryesuesja hapi diskutimin për rendin e ditës.

Pasi nuk kishte të lajmëruar për rendin e ditës Kryesuesja vuri në votim propozimin që pikë e 4-të e rendit të ditës të jetë: Draft-Plani lokal i veprimit për barazi gjinore 2024-2026.

Propozimi që pikë e 4-të e rendit të ditës të jetë: Draft-Plani lokal i veprimit për barazi gjinore 2024-2026 u miratua unanimisht.

Kryesuesja vuri në votim këtë rend dite:

1. Miratimi i procesverbalit nga mbledhja e kaluar
2. Raporti financiar për periudhën janar-qershor 2024

3. Raporti i Auditimit për Pasqyrat Financiare Vjetore të Komunës së Mitrovicës së Jugut për vitin 2023

3.1 Plani i veprimit për zbatimin e rekomandimeve të dhëna në Raportin e Auditimit nga Zyra Kombëtare e Auditimit për vitin 2023

4. Draft-Plani lokal i veprimit për barazi gjinore 2024-2026

**Rendi i ditës u miratua unanimisht.**

**Pika 1**

**Procesverbali nga mbledhja e kaluar u miratua unanimisht.**

**Pika 2**

Kryesuesja e mbledhjes fjalën ia kaloi Drejtoreshës së DBF për ta arsyetuar Raportin financiar për periudhën janar-qershor 2024.

Igballe Islami: Fillimisht më lejoni t'ju njoftoj që Drejtoria për Buxhet dhe Financa kësaj radhe ka qenë në presion të kohës me e dërguar këtë pikë me datë tre korrik, edhe ka qenë një periudhë shumë e shkurtër, domethënë vetëm dy ditë pune për me përgatitë komplet raportin financiar. Andaj, unë ju njoftoj që raporti ka me u ndryshuar për seancën e Kuvendit, meqenëse mungojnë të dhëna të cilat janë kërkuar edhe paraprakisht, mirëpo edhe kërkohen që të prezantohen në këtë raport financiar. Fillimisht mungojnë obligimet financiare kontraktuale, pasi që bazuar në Ligjin për menaxhimin e financave publike dhe përgjegjësitë, data për raportimin e obligimeve financiare pranë Thesarit të Kosovës është data pesëmbëdhjetë e çdo muajt vijues, kështu që raporti është dërguar me datë tre dhe ka qenë e pamundur të sigurohen të gjitha dhënat e nevojshme. Gjithashtu është duke u përgatitur edhe pasqyra e vendimeve gjyqësore, urdhra përmbare të cilat janë ekzekutuar nga Thesari i Kosovës, ku në këtë periudhë gjashtëmuor është ekzekutuar në kategorinë paga dhe shtesa, ku janë urdhra përmbare si pasojë e kontratës kolektive. Kështu që, fillimisht po ju njoftoj që raporti për seancën e Kuvendit do të silltet i plotësuar me këto ndryshime, të cilat ne nuk kemi arritur t'i plotësojmë për shkak të afatit të limituar. Sa i përket të të hyrave, edhe sot me datë njëmbëdhjetë ne ende nuk i kemi pranuar të hyrat indirekte, pra të hyrat nga gjobat nga gjykata dhe agjensioni i pyjeve, dhe rrjedhimisht do të pasqyron vetëm të hyrat direkte të komunës. Në këtë periudhë raportuese, komuna e Mitrovicës ka arritur të përmbush katërdhjetë e një përqind të planit të inkasimit vjetor ose një pikë tre milionë kemi inkasuar gjatë kësaj periudhe, krahasuar me planin që është tre pikë dy milionë. Te ekzekutimi i buxhetit, komuna e Mitrovicës ka arritur të shpenzojë katërdhjetë e tetë për qind në total të buxhetit komunal, duke përfshirë të gjitha fondet burimore, në pagat dhe shtesa gjashtëdhjetë e katër për qind, mallra dhe shërbime pesëdhjetë e dy për qind, shpenzime komunale tridhjetë e nëntë përqind, transfere e subvencione njëzet e dy përqind, si dhe shpenzime kapitale shtatëmbëdhjetë përqind. Meqenëse e thashë që nuk i kemi obligimet kontraktuale dhe nuk e kemi listën e vendimeve gjyqësore përmbare për më detaje do ta diskutojmë edhe në seancën e Kuvendit.

Hysen Muzliukaj: Kam një pyetje për Drejtoreshën e cila tha se raporti financiar nuk është i kompletuar, për seancën e Kuvendit a do të jetë i kompletuar Raporti financiar?

Igballe Islami: Nëse seanca thirret menjëherë kjo do të varet prej Thesarit.

Fadil Veseli: Në shikim të parë të hyrat nuk janë dobët, 41.49 % kështu që te të hyrat është pozitive. Te tabela numër dy që e ceku drejtoresha, te shpenzimet, që kjo është një kategori e ndjeshme, ke katërdhjetë e tetë %. Mirëpo, nëse shikohet te paga dhe mëditje, e shihni si e ka tejkaluar shifrën e planit, është gjashtëdhjetë e katër përqind, për shkak të përmbaremit, mirëpo Kryetari me punën dhe gjindshmërinë e tij shumë punë i ka balancuar. Po kalojmë te investimet kapitale, ne jemi prezentë këtu që zakonisht tre muajt e parë qeveria asnjë cent nuk e alokon për investime kapitale, pas tre muajve, pa i pasë mjetet në llogari, ekzekutivi i ka duart e lidhura që nuk guxon me filluar me projekte edhe me fazën e prokurimit, domethënë, tre muaj duhet me pritë. Kështu që, te çështjet e investimeve kapitale, veç diku pas angazhimit maksimal, projektet mundën me filluar në maj, eventualisht kah fundi i muajit qershor.

Xhyljeta Imeri: Sipas fjalëve të drejtoreshës raporti nuk është i kompletuar, domethënë të dhënat mundet me ndryshuar deri në seancë, por disa që janë zero për qind nuk besoj që ndryshojnë. Unë e kam një vërejtje që sa vite me radhë dhe nuk e di pse po e vazhdoni këtë praktikë, kur ne po kërkojmë me qenë edhe shpenzimet e viteve të kaluara, nuk keni vështirësi, aty i keni të gatshme, ne e bëjmë krahasimin, i gjejmë nëpër emaila materialet, por kurrë nuk është diçka e fshehur për juve, kjo praktikë më parë ka qenë gjithmonë, jeni pajtuar që do t'i sillni raportet në vazhdim, po asnjëherë nuk i keni realizuar. Ju jeni të obliguar me i sjell, ju kisha lut që t'i sjellni të detajuara për mbledhjen e Kuvendit. Gjithashtu është një emërtim këtu “dokumente blanko”, kisha pas dëshirë me ditë çka nënkupton kjo.

Igballe Islami: DBF e kryen obligimin e vet ligjor që ka raportimin në periudha raportuese edhe dokumente të tilla janë të pasqyruara dhe të publikuara në ueb faqen e komunës. Ne meqenëse është kërkesë mundemi me i bashkëngjit edhe vitet paraprake, po shkojmë vetëm tek viti dy mijë e njëzet e tre dhe do ta plotësojmë vetëm në tabelën numër dy, po e kemi realizimin e Buxhetit, do ta krahasojmë me buxhetin e 2023, ndërsa për vitet tjera unë po vlerësoj që nuk është e nevojshme. Ndërsa sa i përket pyetjes çka nënkupton me “dokumente blanko” këto janë kode, të cilat janë pasqyruar dhe bazuar në planin kontabël të Ministrisë së Financave, domethënë Thesarit. Dokumente blanko janë disa drejtori, është pikërisht te Drejtoria e Shëndetësisë, është Drejtoria e Administratës Publike, ajo e Inspeksionit, janë ato dokumentet blanko të cilat me këtë emërtim është e vetmja mënyrë për me i procesuar për pagesë.

Pasi nuk kishte të lajmëruar tjerë për diskutim Kryesuesja vuri në votim Raportin financiar për periudhën janar-qershor 2024.

**Raporti financiar për periudhën janar-qershor 2024 u miratua unanimitisht (9-për, 0-kundër dhe 0-abstenime) dhe i njëjti i procedohet Kuvendit të Komunës për shqyrtim dhe miratim.**

### Pika 3

Kryesuesja znj. Vesa Broja para se të hap diskutimin lidhur me Raportin e Auditimit për Pasqyrat Financiare Vjetore të Komunës së Mitrovicës së Jugut për vitin 2023 dhe Planin e veprimit për zbatimin e rekomandimeve të dhëna në Raportin e Auditimit nga Zyra Kombëtare e Auditimit për vitin 2023, për ta arsyetuar të njëjtën fjalën ia kaloi Drejtoreshës së DBF-së.

Pas arsyetimit të pikës nga Drejtoresha e DBF-së znj. Igballe Islami, Kryesuesja e mbledhjes hapi diskutimin.

Fadil Veseli: Është fat i madh që e kem kryetarin me përvojë edhe na ka ndihmuar shumë, mos me përjashtuar ndihmën e ekzekutivit dhe punën që e ka bërë, ka arritur pas sa viteve e ka kthye trendin dhe kemi opinionin e pa modifikuar. Mirëpo si dhuratë e kësaj dhe fati i mirë është se marrin pjesë në grande, ato grande tash barten te qytetarët dhe na e mundësojnë edhe neve ndonjë projekt me e shtyrë përpara.

Vesel Neziri: E mira e të mirës është dallimi me vitin e kaluar dhe vitin e tanishëm. Tash kemi opinionin e pa kualifikuar dhe është fat se do të fitojmë grand.

Kryesuesja Vesa Broja: Nëse nuk ka të lajmëruar tjerë për diskutim, e vë në votim Raportin e Auditimit për Pasqyrat Financiare Vjetore të Komunës së Mitrovicës së Jugut për vitin 2023 dhe Planin e veprimit për zbatimin e rekomandimeve të dhëna në Raportin e Auditimit nga Zyra Kombëtare e Auditimit për vitin 2023.

**Raporti i Auditimit për Pasqyrat Financiare Vjetore të Komunës së Mitrovicës së Jugut për vitin 2023 dhe Plani i veprimit për zbatimin e rekomandimeve të dhëna në Raportin e Auditimit nga Zyra Kombëtare e Auditimit për vitin 2023 u miratua unanimitisht (9-për, 0-kundër dhe 0-abstenime) dhe i njëjti i procedohet Kuvendit të Komunës për shqyrtim dhe miratim.**

### Pika 4

Kryesuesja znj. Vesa Broja hapi diskutimin lidhur me Draft-Planin lokal të veprimit për barazi gjinore 2024-2026.

Pasi nuk kishte të lajmëruar për diskutim Kryesuesja vuri në votim Draft-Planin lokal të veprimit për barazi gjinore 2024-2026.

**Draft-Plani lokal i veprimit për barazi gjinore 2024-2026 (9-për, 0-kundër dhe 0-abstenime) dhe i njëjti i procedohet Kuvendit të Komunës për shqyrtim dhe miratim.**

**Mbledhja përfundoi punimet në ora 11:40 min.**

Mitrovicë

Procesmbajtës:

  
Merita PRETENI



Kryesuesja e Kuvendit

  
Vesa BROJA